

**BOSNA I HERCEGOVINA  
FEDERACIJA BOSNE I HERCEGOVINE  
KANTON SARAJEVO  
S A R A J E V O**

**P R A V I L N I K  
O UZIMANJU UZORAKA I PROIZVODA I NJIHOVO DOSTAVLJANJE  
NA ISPITIVANJE OVLAŠTENIM STRUČNIM INSTITUCIJAMA**

Sarajevo, april 2017.

Na osnovu člana 66. Zakona o inspekcijama Kantona Sarajevo („Službene novine Kantona Sarajevo broj 2/17) direktor Kantonalne uprave za inspekcijske poslove Kantona Sarajevo  
d o n o s i

**P R A V I L N I K**  
**O UZIMANJU UZORAKA I PROIZVODA I NJIHOVO DOSTAVLJANJE**  
**NA ISPITIVANJE OVLAŠTENIM STRUČNIM INSTITUCIJAMA**

**I OSNOVNE ODREDBE**

**Član 1.**  
**(Predmet)**

Ovim pravilnikom utvrđuje se način i postupak uzimanja uzoraka koje je inspektor prema posebnim propisima obavezan ili ovlašten uzeti, čuvanja uzetih uzoraka i dostavljanja tih uzoraka na laboratorijsko ispitivanje ovlaštenim stručnim institucijama za ispitivanje (u daljem tekstu: stručna institucija) da bi se utvrdilo da li proizvodi u proizvodnji ili u prometu odgovaraju propisanoj zdravstvenoj ispravnosti i deklarisanom sistemu, odnosno propisanom i deklarisanom kvalitetu i standardu, te da li zadovoljavaju sigurnosne zahtjeve za stavljanje na tržište Bosne i Hercegovine (u daljem tekstu: propisani uvjeti).

**Član 2.**  
**( Obaveza uzimanja uzoraka)**

Odredbе ovog pravilnika odnose se na postupak uzimanja uzoraka proizvoda koje je inspektor na osnovu posebnih propisa obavezan ili ovlašten uzeti u slijedećim slučajevima:

- na mjestima proizvodnje domaćih proizvođača;
- u prometu na tržištu kada je potrebno izvršiti kontrolu da li proizvodi ispunjavaju propisane uslove;
- u slučajevima kada procijeni da postoji sumnja da proizvodi ne ispunjavaju ili su prestali ispunjavati propisane uslove;
- po nalogu nadležnih regulatornih agencija radi propisanih uslova koje moraju ispunjavati;
- u slučajevima propisanog monitoringa.

**Član 3.**  
**(Uzimanje uzoraka)**

- (1) Inspektor je, ovisno od mjesta na kojem vrši kontrolu da li proizvodi ispunjavaju propisane uslove, obavezan uzorke koje šalje na laboratorijsko ispitivanje uzeti u prisustvu vlasnika proizvoda, ovlaštene osobe ili zastupnika, ukoliko je to propisano posebnim propisima.
- (2) Vlasnik proizvoda obavezan je inspektoru dozvoliti da bez naknade uzme potrebnu količinu uzorka od proizvoda kojeg je potrebno laboratorijski ispitati.

**Član 4.**  
**(Postupak uzimanja uzoraka)**

- (1) Za potrebe laboratorijskog ispitivanja inspektor uzima najviše tri uzorka.
- (2) Inspektor je obavezan sve uzorke od istog proizvoda uzeti pod istim uslovima, u isto vrijeme, po postupku i u količini koja je posebnim propisom određena za potrebe laboratorijskog ispitivanja, a kada priroda pregleda to zahtjeva, uzorci se uzimaju sterilnim priborom i pakuje u sterilnu ambalažu.
- (3) Podatke o uzimanju uzoraka inspektor konstatuje u zapisniku koji sastavlja pri vršenju kontrole pošiljke i uzimanju uzoraka, te se primjerak zapisnika ustupa stranci - subjektu nadzora.
- (4) U slučajevima kada uzimanje uzoraka zahtjeva posebnu stručnost, kao i u slučajevima kada uzimanje uzoraka zahtjeva primjenu posebnih instrumenata ili metoda, inspektor je ovlašten zatražiti usluge stručne organizacije u čijoj će se laboratoriji izvršiti ispitivanje.
- (5) U slučajevima propisanim stavom (4) ovog člana uzimanje uzoraka vrši se u prisustvu inspektora koji u zapisniku navodi osobu koja je uzela uzorke i stručnu organizaciju u kojoj je uposlen.
- (6) Zapisnik o kontroli pošiljke i uzimanju uzoraka se ne dostavlja stručnoj organizaciji koja obavlja ispitivanje.

**Član 5.**  
**(Transportovanje uzoraka)**

- (1) Pri uzimanju uzoraka, uzima se najmanja količina uzorka koja je potrebna za laboratorijsko ispitivanje te vrste proizvoda, odnosno količina koja je propisana posebnim propisima.
- (2) Svaki uzorak koji se šalje na laboratorijsko ispitivanje, neovisno da li je u originalnom pakovanju ili u rasutom stanju- rinfuzi (tečnom i krutom stanju), obavezno je upakovati u adekvatnu ambalažu, te zapečatiti i označiti na način da se sačuva integritet uzorka.
- (3) Uzeti uzorci pakuju se i transportuju u uslovima koji neće uticati na njihov sastav, higijensko - sanitarne uslove kao i uslove kvaliteta.
- (4) Uzorke proizvoda u smrznutom stanju i od proizvoda koji zahtjevaju temperaturni režim obavezno je čuvati i transportovati u uslovima koji su propisani za tu vrstu proizvoda.

**Član 6.**  
**(Pakovanje uzoraka)**

- (1) Uzeti uzorci pakuju se ovisno o prirodi uzorka, stanja i originalnog pakovanja, u pravilu u papirne ili plastične vrećice, staklene ili plastične posude, pergament papir ili plastične folije, odnosno na drugi pogodan način, a samo pakovanje se uvezuje, pečati i označava.

- (2) Na omotu upakovanog uzorka navodi se:
- broj zapisnika u kome je konstatovano uzimanje uzorka i redni broj uzorka,
  - datum uzimanja uzorka,
  - ime i prezime inspektora,
  - potpis inspektora,
  - na svakom uzorku se upisuje njegova namjena („ZA POTREBE ISPITIVANJA“, „ZA POTREBE SUPERANALIZE“, „ZA POTREBE SUBJEKTA KONTROLE“)

**Član 7.**  
**(Rok za dostavu uzoraka)**

- (1) Inspektor je obavezan uzorak dostaviti u stručnu instituciju koja će izvršiti laboratorijsko ispitivanje uzoraka najkasnije u roku od tri dana od dana uzimanja uzoraka, ukoliko za tu vrstu proizvoda nije posebnim propisom propisan drugačiji rok za dostavljanje uzoraka.
- (2) Uzorak se dostavlja uz zahtjev za laboratorijsku analizu koji potpisuje i ovjerava inspektor.
- (3) U zahtjevu za laboratorijsku analizu se navode samo podaci o proizvodu koji su neophodni za vršenje ispitivanja.
- (4) Inspektor može uzorke na laboratorijsko ispitivanje dostavljati neposredno u stručnu instituciju koja će izvršiti ispitivanje, putem pošte, putem osoba stručne institucije u čijoj će se laboratoriji ispitati uzeti uzorci proizvoda ili na drugi podesan način koji osigurava integritet uzorka i očuvanje kvaliteta i svojstava proizvoda.

**Član 8.**  
**(Čuvanje uzoraka)**

- (1) Sa uzorkom uzetim za potrebe superanalize inspektor je obavezan postupati na način da isti drži u uslovima koji su propisani za čuvanje i održavanje proizvoda od kojeg je uzet uzorak.
- (2) U izuzetnim slučajevima, inspektor je ovlašten da uzorak uzet za potrebe superanalize, ostavi na čuvanje kod vlasnika proizvoda, s tim da je u zapisniku o uzimanju uzoraka obavezan navesti uslove kojih je vlasnik uzorka obavezan pridržavati se.
- (3) Vlasnik proizvoda odgovoran je za čuvanje uzorka prema datim uputama iz prethodnog stava.

**Član 9.**  
**( Dostava nalaza stručne institucije)**

- (1) Stručna institucija rezultate obavljenog ispitivanja uzorka dostavlja isključivo inspektoru, odnosno inspekcijском tijelu koje je dostavilo uzorak.
- (2) Stručna institucija ne smije dostavljati rezultate obavljenog ispitivanja, odnosno podatke ili informacije o obavljenom ispitivanju trećim osobama, uključujući i subjekta nadzora.

**Član 10.**  
**(Obavješćavanje subjekta nadzora o rezultatima ispitivanja)**

- (1) Inspektor je dužan bez odlaganja u pismenom obliku obavijestiti subjekt nadzora o rezultatima obavljenog ispitivanja uzorka, a najkasnije u roku od tri dana od dana prijema nalaza kao i da bez odlaganja poduzme mjere propisane posebnim propisima za proizvode koji ne ispunjavaju propisane uslove.
- (2) U slučajevima kada se laboratorijskim ispitivanjem utvrdi da proizvod ispunjava propisane uslove, inspektor je obavezan vratiti preostale uzorke ispitivanog proizvoda uz potvrdu o povratu kontrolnog primjerka uzorka, koju obavezno potpisuje predstavnik subjekta kontrole.
- (3) Sa uzorcima proizvoda za koje se laboratorijskim ispitivanjem utvrdi da ne ispunjavaju propisane uslove, nakon okončanja postupka, postupaju se na način propisan za postupanje sa proizvodima koji ne ispunjavaju propisane uslove.

**Član 11.**  
**(Ponovni postupak ispitivanja – superanaliza)**

- (1) U slučajevima kada nije zadovoljan rezultatima laboratorijskog ispitivanja, subjekt nadzora ima pravo tražiti da se ponovi postupak ispitivanja - superanalize, kod druge stručne institucije ovlaštene za ispitivanje uzoraka na način i istom metodom kojom je obavljeno prvo ispitivanje.
- (2) Zahtjev iz stava (1) ovog člana vlasnik proizvoda može podnijeti inspektoru pismenim putem u roku od tri dana od dana kada je upoznat sa rezultatom analiza.
- (3) Inspektor je obavezan bez odlaganja dostaviti uzorak koji je ostavio za potrebe superanalize u laboratoriju koja će vršiti superanalizu, a najkasnije u roku od tri dana.
- (4) Sa drugim uzorkom, koji se šalje na superanalizu, inspektor je obavezan postupati na način i po postupku propisanim za prvi uzorak.

**Član 12.**  
**(Mjerodavnost ponovljenog nalaza)**

- (1) U slučaju da nalaz ponovljenog ispitivanja nije saglasan sa prvim nalazom, mjerodavan je nalaz ponovljenog ispitivanja.

- (2) Ako vlasnik proizvoda u roku od tri dana ne zatraži, odnosno ne podnese zahtjev inspektoru za ponovnu provjeru propisanih uslova, smatrat će se da je zadovoljan sa dobivenim rezultatima laboratorijskih ispitivanja.

**Član 13.**  
**(Troškovi laboratorijskog ispitivanja)**

- (1) Kada se utvrdi da uzorci ne ispunjavaju propisane uslove, troškove laboratorijskog ispitivanja uzetih uzoraka snosi vlasnik proizvoda, a u slučaju da uzeti uzorci ispunjavaju propisane uslove ispitivanog proizvoda, troškovi padaju na teret sredstava budžeta organa u čijem je sastavu inspektor koji je uzeo uzorke na laboratorijsko ispitivanje, ukoliko posebnim propisom nije drugačije određeno.
- (2) Snošenje troškova laboratorijskog ispitivanja uzoraka koje je inspektor uzeo po propisanom monitoringu utvrdit će se programom monitoringa, ukoliko posebnim propisom nije drugačije određeno.

**Član 14.**  
**(Stupanje na snagu )**  
Ovaj pravilnik stupa na snagu danom donošenja.

Broj: 14-01-49- 01841/17  
Sarajevo, 10.04.2017. god.

**DIREKTOR**  
Heni Erduan Česir